

# Sinerissap qanittuani qaleralinniarneq pillugu Namminersorlutik Oqartussat nalunaarutaat

Aalisarnek pillugu Inatsisartut inatsisaanni nr. 18, 31. oktober 1996-imeersumi, ilaatigut Inatsisartut inatsisaatigut nr. 5, 21. maj 2002-meersukkut allanngortinneqartumi, kingullermillu Inatsisartut inatsisaatigut nr. 12, 13. december 2012-imeersukkut allanngortinneqartumi § 10, § 10a, § 13, imm. 2 aamma imm. 3, § 23, § 33, imm. 1, nr. 3 aamma imm. 2 aamma § 34, imm. 3 naapertorlugit aalajangersarneqarpoq:

## *Atuuffia*

§ 1. Sinerissap titarnerullu aalisarnikkut oqartussaaffiup tunngaviusumik killingata 3 sømilinik avataaniittup akornanni angallatit 75 BRT/120 BT-mit mikinerusut atorlugit inuussutissarsiutigalugu qaleralinniarnermi nalunaarut atuuppoq.

## *Nassuiaatit*

§ 2. Sinerissap qanittuani qaleralinniarnermi aqutsiveqarfik ukua aalajangersaavigineqarput:

- 1) Aqutsiveqarfik Upernavik, nassuiarneqartoq 71° 30'N avannaanit 75° 00'N kujataanut imartami sinerissamiit aamma titarnerup aalisarnikkut oqartussaaffigisami tunngaviusumik killigtitamit 3 sømilit avataanut.
- 2) Aqutsiveqarfik Uummannaq, nassuiarneqartoq 70° 30'N avannaanit 71° 30'N ku-jataanut imartami sinerissamiit aamma titarnerup aalisarnikkut oqartussaaffigisamut tunngaviusumik killigtitamit sømilit pingasut avataanut. Kisiannili 70° 30'N kujataani taamaallaat Ikerasaap Sulluani Qarassallu Imaani aalisartoqarsinnaavoq. Aammattaaq 71° 30'N avannaani kangerlunni aalisartoqarsinnaavoq, kangerlunni ukunani: Karrat, Kangilleq, Inngiata Kangerlua, Ukkusissat Kangerluat, Kangiussap Imaa, Umiiviup Kangerlua aamma Nuugaatsiap tunua.
- 3) Aqutsiveqarfik Qeqertarsuup Tunua, Qeqertarsuup Tunua nassuiarneqarpoq 68° 52,5'N avannaanit 70° 30'N kujataanut imartami sinerissamiit aamma titarnerup aalisarnikkut oqartussaaffigisamut tunngaviusumik killigtitamit sømilit pingasut avataanut
- 4) Kalaallit Nunaata aqutsiveqarfik nr. 1-3-mi taaneqartut avataanniittoq aqutsiveqarfimmik Kalaallit Nunaata sinneranik taagorneqassaaq

## *Inuussutissarsiutigalugu qaleralinniarnermi angallatit*

§ 3. Aqutsiveqarfinni Upernavimmi, Uummannami, Qeqertarsuullu Tunuani angallatit 19,99 BRT / 31,99 BT-mit anginerusut atorlugit inuussutissarsiutigalugu qaleralinniarnissaq akuerisaanngilaq.

*Akuersissutit, pisassiissutit aqutsiveqarfillu*

**§ 4.** Angallatit 6 meterimik (tamarmiusumik takissusia) taannalu tikillugu angissusillit atorlugit imaluunniit taanna ataallugu angissusilinnik inuussutissarsiutigalugu qaleralinniassagaanni, tamatumunnga akuersissummik peqarnissaq piunasaqaataavoq.

*Imm. 2.* Angallatit 6 meter sinnerlugu tamakkiisumik angissusillit atorlugit inuussutissarsiutigalugu qaleralinniassagaanni, tamatumunnga akuersissummik peqarnissaq piunasaqaataavoq. Akuersissummi angallatit FTJ-normullit imaluunniit GR-normullit suut atorneqarniarnersut allanneqassaaq.

*Imm. 3.* Imm. 1 aamma 2 naapertorlugit angallatip angissusaa nalornissutigineqartillugu angallatip angissusaa pillugu nutaamik uuttortaasoqareerpat Aalisarsinnaanermut Akuersissutinik Nakkutilliisoqarfik aalajangiissaaq.

*Imm. 4.* Angallammut 6 meter sinnerlugu imaluunniit inorlugu tamakkiisumik angissusilinnut akuersissut aamma qimusseq atorlugu qaleralinniarnermut atorneqarsinnaavoq.

**§ 5.** § 2 naapertorlugu aqutsiveqarfinni sisamani sinerissamut qanittumi qaleralittarineqarsinnaasutut pisassiissutit ukiut tamaasa Naalakkersuisut aalajangersartassavaat uumassusilerinikkut siunnersuineq tunngavigalugu.

*Imm. 2.* Aqutsiveqarfiit Upernavik, Uummannaq Qeqertarsuullu Tunua eqqarsaatigalugit angallatinut 6 meter sinnerlugit tamakkiisumik angissusilinnut aamma angallatinut 6 meter taannaluunniit inorlugu angissusilinnut immikkut pisassanik aalajangersaasoqassaaq.

**§ 6.** Sumiiffinni ukunani pifat § 5 naapertorlugu pisassiissutinut ilaanngillat:

- 1) Sumiiffimmi nassuiarneqartoq 71° 30'N avannaanit 72° 30'N kujataanut kiisalu sumiiffimmi nassuiarneqartoq 73° 52,5'N avannaanit 75° 00'N kujataanut Aqutsiveqarfik Upernavimmi.
- 2) Sumiiffimmi nassuiarneqartoq allorniusat ammukaartut 52°30V kitaani aqutsiveqarfik Uummannami.
- 3) Sumiiffimmi nassuiarneqartoq allorniusat ammukaartut 51°30V kitaani aqutsiveqarfik Qeqertarsuup Tunuani.
- 4) Sumiiffimmi nassuiarneqartoq allorniusat ammukaartut 51°00V kangiani Ilulissat Kangerluani aqutsiveqarfimmi Qeqertarsuup Tunuani pifat qimussimik pisaallutillu assartorneqarpata.

**§ 7.** Angallatit 6 meterisut tamakkiisumik angissusillit taannaluunniit ataallugu angissusillit atorlugit qaleralinniarsinnaanermut akuersissutinik ukuninnga tunniussisoqartassaaq:

- 1) Aqutsiveqarfinni Upernavimmi, Uummannami aamma Qeqertarsuup Tunuani piffissami killiligaanngitsumi pisassat qaffasinnerpaaffissalerlugit aalisarsinnaanermut akuersissutit tunniunneqartassapput
- 2) Aqutsiveqarfimmut Kalaallit Nunaata sinneranut aalisarsinnaanermut akuersissutit sivisunerpaamik ukiumik ataatsimik killilerlugit tunniunneqartassapput pisarineqarsinnaasullu qaffasinnerpaaffissaannik qummut killiliinngitsumik

**§ 8.** Angallatinut 6 meterinik tamakkiisumik angissusilinnut taannaluunniit ataallugu angissusilinnut qaleralinniarnissamut akuersissutit makkua tunniunneqartassapput:

- 1) Aqutsiveqarfinni Upernavimmi, Uummannami aamma Qeqertarsuup Tunuani akuersissutit piffissamik killilerlugit pisassallu tamakkiisumik qaffasinnerpaaffissalerlugit aalisarsinnaanermut akuersissutit tunniunneqartassapput.
- 2) Aqutsiveqarfimmi Kalaallit Nunaata sinneranut akuersissutit piffissamik killilerlugit tunniunneqartassapput aalisarneqarsinnaasullu qaffasinnerpaaffissaannik qummut killiliinngitsumik.

*Imm. 2.* Akuersissutit imm. 1 naapertorlugu sivisunerpaamik ukioq ataaseq atuuttussatut tunniunneqartassapput

**§ 9.** Aqutsiveqarfinni Upernavimmi, Uummannammi aamma Qeqertarsuup Tunuani qaleralinniarnissamut akuersissutit aqutsiveqarfinni taaneqartuni tamani atorineqarsinnaapput, kisianni aqutsiveqarfimmi Kalaallit Nunaata sinneranut pinnani.

*Imm. 2.* Aqutsiveqarfimmut Kalaallit Nunaata sinneranut aalisarsinnaanermut akuersissutit taamaallaat aqutsiveqarfimmi Kalaallit Nunaata sinnerani atorineqarsinnaapput.

#### *Inuussutissarsiutigalugu qaleralinniarnermi piniutit atorineqartut*

**§ 10.** Qassutinik qalorsuarsorlunilluunniit inuussutissarsiutigalugu qaleralinniarneq inerteqqutaavoq.

*Imm. 2.* Kommunit ileqqoreqqusaliaanni imm. 1-imi immikkut akuersissuteqarsinnaanermut malittarisassanik erseqqinnerusunik aalajangersaasoqarsinnaavoq, taamaalilluni aalisarfinni killilersorsimasuni qaasusersorluni aalisarnissaq akuerineqarsinnaatillugu.

*Imm. 3.* Taamaattorli Aalisarnermut, Piniarnermut Nunalerinermullu Naalakkersuisoq aalajangiisnaavoq, imm. 2 naapertorlugu qassusersorluni aalisarneq piffissami aalajangersimasumi matuneqassasoq, tamanna pisassiissutitigut pissutsit pisariqartilerpasuk imaluunniit qalerallit tunisassiarineqarnerisa pitsaassusaat pitsanngortinniarlugu.

**§ 11.** Aalisarneq unitsinneqartillugu aalisarteq pisussaavoq atortumi qaqinnissaanut pisariaqanngitsumik kinguarsaanani.

*Imm. 2.* Aalisarteq atortuminik annaasaminik ujaasinissamut pisussaaffeqarpoq.

*Imm. 3.* Aalisarnermut atortut piginnittup aqqanik najugaqarfianilluunniit imaluunniit angallatip aqqanik aamma angallatip normuanik nalunaaqutsersugaassapput. Nalunaaqutsiinermi atortoq imermit allanngortinneqarsinnaasuusanngilaq. Qassutinut nalunaaqutsiussa qimiaanut qullermut ikkunneqassaaq. Ningittakkanut nalunaaqutsiussa ningittakkanut ikkunneqassaaq. Nalunaaqutsiussat atorineqartut atortunut atorineqanngitsunut tamanut assingusumik ikkussorneqassapput.

*Imm. 4.* Qaleralinniarnermi atortoq atortunut allanut minnerpaamik 50 meterinik ungasitsitigillugu inissinneqassaaq.

*Imm. 5.* Atortut marluk ilarussimatillugit, nammineq atortut killorlugit ilarussimasut piiarneqartassapput.

#### *Immikkut ittumik akuersissutit*

**§ 12.** Aalisarnermut, Piniarnermut Nunalerinermullu Naalakkersuisoq § 4, imm. 1 aamma imm. 2 naapertorlugit aalisarnissamut akuersissummik piunasaqaammut immikkut akuersissuteqarsinnaavoq, Qaanaami najugalinnut nunaqarfianilu, Illoqqortoormiuni nunaqarfianilu kiisalu Tasiilami nunaqarfianilu najugalinnut.

#### *Pineqaatissiissutit*

**§ 13.** § 3, § 4, imm. 1 aamma imm. 2, § 10, imm. 1, kiisalu § 11-imi unioqqutitsisoqartillugu, akiligassiisoqarsinnaavoq.

*Imm. 2.* Inuussutissarsiutigalugu qaleralinniarneq akuersissuteqarfiusup avataani ingerlanneqartoq tassunga ilanngullugu § 8-mik sumiginnaaneq, imm. 1 naapertorlugu akuersissuteqarnani aalisarnertut isigineqassaaq.

*Imm. 3.* Qaleralinniarnermut akuersissummi atugassarititaasumik unioqqutitsisoqartillugu

akiligassiisoqarsinnaavoq.

*Imm. 4.* Imm. 1-3-lu malillugit akiligassiinerit Kalaallit Nunaanni Pinerluttulerinermut inatsimmi malittarisassat naapertorlugit inatsisitigut attuumassutilittut isigineqarsinnaasunut akiligassiissutigineqarsinnaapput.

*Atuutilersitsineq*

**§ 14.** Nalunaarut ulloq 15. september 2014-imi atuutilerpoq.

*Imm. 2* Peqatigitillugulu Sinerissap qanittuani qaleralinniarneq pillugu Namminersorlutik Oqartussat nalunaarutaat nr 2, 2 februar 2012-imeersoq atorunnaarsinneqarpoq.

*Kalaallit Nunaanni Namminersorlutik Oqartussat, ulloq 28. august 2014.*

Finn Karlsen

/

Jørgen Isak Olsen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut